



O'ZBEKISTON RESPUBLIKASI VAZIRLAR MAHKAMASINING QARORI

20 21 yil « 16 » avgust

№ 523

Toshkent sh.

Кам таъминланган оилалар фарзандларининг умумтаълим муассасаларидаги куни узайтирилган гуруҳларда ўқишини моддий жиҳатдан қўллаб-қувватлаш чора-тадбирлари тўғрисида

Республикада кам таъминланган оилалар, хотин-қизлар ва ёшларни қўллаб-қувватлаш, уларнинг билим олиш имкониятларини кенгайтириш ҳамда кам таъминланган оилалар фарзандларининг умумтаълим муассасаларида куни узайтирилган гуруҳларда ўқишини моддий жиҳатдан қўллаб-қувватлаш мақсадида Вазирлар Маҳкамаси **қарор қилади**:

1. Ўзбекистон Республикаси Молия вазирлиги, Халқ таълими вазирлиги, Маҳалла ва оилани қўллаб-қувватлаш вазирлиги ҳамда Ёшлар ишлари агентлигининг кам таъминланган оилалар фарзандларининг умумтаълим муассасаларидаги куни узайтирилган гуруҳларда болалар таъминоти учун ота-оналар тўловини “Аёллар дафтари”га киритилган хотин-қизларни қўллаб-қувватлаш жамғармаси, “Ёшлар дафтари”га киритилган ёшларни қўллаб-қувватлаш жамғармаси ва “Саховат ва кўмак” жамғармаси маблағлари ҳисобидан қоплаб бериш тўғрисидаги таклифлари маъқуллансин.

2. Белгилансинки, умумтаълим муассасаларидаги куни узайтирилган гуруҳларда болалар таъминоти учун ота-оналар тўловлари “Ижтимоий ҳимоя ягона реестри” ахборот тизими орқали кам таъминланган деб эътироф этилган:

“Аёллар дафтари”га киритилган хотин-қизларнинг фарзандлари учун – “Аёллар дафтари”га киритилган хотин-қизларни қўллаб-қувватлаш жамғармаси маблағлари ҳисобидан;

“Ёшлар дафтари”га киритилган ёшлар учун – “Ёшлар дафтари”га киритилган ёшларни қўллаб-қувватлаш жамғармаси маблағлари ҳисобидан;

“Темир дафтар”га киритилган оилаларнинг фарзандлари учун – “Саховат ва кўмак” жамғармаси маблағлари ҳисобидан;

“Аёллар дафтари”, “Ёшлар дафтари” ва “Темир дафтар”га киритилмаган оила (шахс)ларнинг фарзандлари ва ёшлар учун – “Саховат ва кўмак” жамғармаси маблағлари ҳисобидан қоплаб берилади.

3. Қуйидагиларни назарда тутувчи **Кам таъминланган оилалар фарзандларининг умумтаълим муассасаларидаги куни узайтирилган гуруҳларда болалар таъминоти учун ота-оналар тўловини қоплаб бериш тартиби тўғрисидаги низом** 1-иловага мувофиқ тасдиқлансин:

кам таъминланган оилалар фарзандларининг умумтаълим муассасаларидаги куни узайтирилган гуруҳларда ўқишга хоҳиш ва имкониятларини ўрганиш ҳамда ўқиш истагида бўлганларнинг рўйхатларини шакллантириш;

кам таъминланган оилалар фарзандларининг умумтаълим муассасаларидаги куни узайтирилган гуруҳларда ўқиши учун ота-оналар тўловини “Аёллар дафтари”га киритилган хотин-қизларни қўллаб-қувватлаш жамғармаси, “Ёшлар дафтари”га киритилган ёшларни қўллаб-қувватлаш жамғармаси ҳамда “Саховат ва кўмак” жамғармаси маблағлари ҳисобидан қоплаб бериш тартиби.

4. Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари раҳбарлари, кам таъминланган оилалар фарзандларининг умумтаълим муассасаларидаги куни узайтирилган гуруҳларда болалар таъминоти учун ота-оналар тўловлари ўз вақтида қоплаб берилишини ва куни узайтирилган гуруҳларда болаларнинг қатновини ҳар чоракда камида бир марта пухта таҳлил қилган ҳолда, жойларда кўрилаётган чоралар самарадорлиги тўғрисида масъул ташкилотлар раҳбарлари билан биргаликда тегишли халқ депутатлари маҳаллий кенгашларида ҳисобот бериб борсинлар.

5. Ўзбекистон Республикаси Ҳукуматининг 2-иловага мувофиқ айрим ҳужжатларига ўзгартириш ва қўшимчалар киритилсин.

6. Ўзбекистон Республикаси Халқ таълими вазирлиги манфаатдор вазирликлар ва идоралар билан биргаликда ўзлари қабул қилган норматив-ҳуқуқий ҳужжатларни бир ой муддатда ушбу қарорга мувофиқлаштирсин.

7. Мазкур қарорнинг бажарилишини назорат қилиш Ўзбекистон Республикаси Бош вазирининг молия-иқтисодиёт ва камбағалликни қисқартириш масалалари бўйича ўринбосари – иқтисодий тараққиёт ва камбағалликни қисқартириш вазири Ж.А. Қўчқоров ҳамда Ўзбекистон Республикаси Бош вазирининг ижтимоий ривожлантириш масалалари бўйича ўринбосари Б.А. Мусаев зиммасига юклансин.

**Ўзбекистон Республикасининг
Бош вазири**



А. Арипов

Вазирлар Маҳкамасининг
2021 йил 16 августдаги 523сон қарорига
1-илова

**Кам таъминланган оилалар фарзандларининг умумтаълим муассасаларидаги куни узайтирилган гуруҳларда болалар таъминоти учун ота-оналар тўловини қоплаб бериш тартиби тўғрисида
НИЗОМ**

1-боб. Умумий қоидалар

1. Мазкур Низом “Ижтимоий ҳимоя ягона реестри” ахборот тизими орқали кам таъминланган деб эътироф этилган оила (шахс)ларнинг (кейинги ўринларда – кам таъминланган оилалар) фарзандларини умумтаълим муассасалари ва айрим фанлар чуқур ўрганиладиган давлат ихтисослаштирилган умумтаълим муассасаларидаги (кейинги ўринларда – умумтаълим муассасалари) куни узайтирилган гуруҳларда болалар таъминоти учун ота-оналар тўловини (кейинги ўринларда – тўлов) “Аёллар дафтари”га киритилган хотин-қизларни қўллаб-қувватлаш жамғармаси, “Ёшлар дафтари”га киритилган ёшларни қўллаб-қувватлаш жамғармаси ҳамда “Саховат ва кўмак” жамғармаси (кейинги ўринларда – жамғармалар) маблағлари ҳисобидан қоплаб бериш тартибини белгилайди.

2. Тўлов жамғармалар маблағлари ҳисобидан ҳар бир болага ўқув йили давомида бир ой учун базавий ҳисоблаш миқдорининг 25 фоизигача бўлган миқдорда қоплаб берилади.

3. Ушбу Низом Ўзбекистон Республикаси Президентининг 2010 йил 24 декабрдаги ПҚ–1449-сон қарорига асосан умумтаълим муассасаларидаги куни узайтирилган гуруҳларда болалар таъминоти учун ота-оналар тўловидан озод этилган кам таъминланган оилаларнинг фарзандларига нисбатан татбиқ этилмайди.

2-боб. Кам таъминланган оилалар фарзандлари рўйхатларини шакллантириш

4. Кам таъминланган оилалар фарзандларининг рўйхатларини шакллантириш ва умумтаълим муассасаларидаги куни узайтирилган гуруҳларда болалар таъминоти учун ота-оналар тўловларни қоплаб бериш ушбу Низомнинг 1-илосига мувофиқ схема бўйича амалга оширилади.

5. Туман (шаҳар) халқ таълими бўлимлари умумтаълим муассасалари билан биргаликда ҳар йили 1 августга қадар Ўзбекистон Республикаси Халқ таълими вазирлигининг “Ижтимоий ҳимоя” ахборот тизимида мавжуд бўлган ўқувчилар тўғрисидаги маълумотлар асосида тегишли умумтаълим муассасаларида таълим олаётган кам таъминланган оилалар фарзандларини аниқлайди.

Бунда, аниқланган рўйхатлардан умумтаълим муассасаларининг куни узайтирилган гуруҳларида ўқиш истаги бўлмаган ҳамда тўлов тўлашдан озод этилган кам таъминланган оила фарзандлари чиқариб ташланади.

6. Туман (шаҳар) халқ таълими бўлимлари бўйсунувидаги умумтаълим муассасалари билан биргаликда ҳар йили 5 августга қадар ушбу Низомнинг 2-иловасига мувофиқ умумтаълим муассасаларидаги куни узайтирилган гуруҳларда ўқиш истагида бўлган ҳамда тўлов тўлашдан озод этилмаган кам таъминланган оилаларнинг фарзандлари рўйхатини шакллантиради.

Рўйхатларни шакллантириш жараёнида умумтаълим муассасалари туман (шаҳар) маҳалла ва оилани қўллаб-қувватлаш бўлими билан биргаликда кам таъминланган оилалар фарзандларининг умумтаълим муассасалардаги куни узайтирилган гуруҳларда ўқишга бўлган хоҳиш ва имкониятларини улар билан суҳбат ўтказиш орқали ўрганади ва инобатга олади.

7. Шакллантирилган рўйхатлар ҳар йили 10 августга қадар туман (шаҳар) маҳалла ва оилани қўллаб-қувватлаш бўлими, Ёшлар ишлари агентлиги бўлими, “Маҳалла” хайрия жамоат фондининг бўлими билан келишилади ва халқ депутатлари туман (шаҳар) кенгашига тасдиқлаш учун киритилади.

Бунда, ушбу рўйхатлар туман (шаҳар) халқ таълими бўлимлари томонидан маҳалла ва оилани қўллаб-қувватлаш бўлими, Ёшлар ишлари агентлиги бўлими, “Маҳалла” хайрия жамоат фондининг бўлими билан электрон равишда (электрон тизим орқали) келишилади ҳамда халқ депутатлари туман (шаҳар) кенгашига келишув хатларини илова қилган ҳолда киритади.

3-боб. Тўловни жамғармаларнинг маблағлари ҳисобидан қоплаб бериш

8. Халқ депутатлари туман (шаҳар) кенгашининг кам таъминланган оилаларнинг умумтаълим муассасаларидаги куни узайтирилган гуруҳларда ўқийдиган фарзандларининг тўловларини қоплаб бериш тўғрисидаги қарори (кейинги ўринларда – қарор) қабул қилинганидан сўнг бир кун ичида туман (шаҳар) халқ таълими бўлими мазкур қарорни тегишли умумтаълим муассасаларига етказди.

Умумтаълим муассасаси қарор келиб тушган кундан бошлаб уч кун ичида мазкур қарорда назарда тутилган ўқувчиларнинг ота-оналари (ёки уларнинг ўрнини босувчи шахслар) билан шартнома тузади.

Тузилган шартномаларнинг нусхалари халқ депутатлари туман (шаҳар) кенгаши қарори қабул қилингандан кейин ўн кун ичида жамланади ва тегишлилиги бўйича туман (шаҳар) ҳокимлиги ва “Маҳалла” хайрия жамоат фонди бўлимига белгиланган тартибда тўловларни амалга ошириш учун юборилади.

9. Тўлов қуйидаги манбалар ҳисобидан қоплаб берилади:

“Аёллар дафтари”га киритилган ва кам таъминланган оиладаги хотин-қизларнинг фарзандлари учун – “Аёллар дафтари”га киритилган хотин-қизларни қўллаб-қувватлаш жамғармаси маблағлари ҳисобидан;

“Ёшлар дафтари”га киритилган ёшлар учун – “Ёшлар дафтари”га киритилган ёшларни қўллаб-қувватлаш жамғармаси маблағлари ҳисобидан;

“Темир дафтар”га киритилган оилаларнинг фарзандлари учун тўловлар – “Саховат ва кўмак” жамғармаси маблағлари ҳисобидан;

“Аёллар дафтари”, “Ёшлар дафтари” ва “Темир дафтар”га киритилмаган оилаларнинг фарзандлари ва ёшлар учун тўловлар – “Саховат ва кўмак” жамғармаси маблағлари ҳисобидан.

10. Туман (шаҳар) ҳокимлиги ва “Маҳалла” хайрия жамоат фонди бўлимининг бухгалтерия бўлими томонидан тўлов ўқув йили (сентябрь – май ойлари) давомида ойма-ой тўлаб борилади. Жорий ой учун тўлов шу ойнинг ўнинчи санасидан кечиктирмасдан амалга оширилади.

11. Кам таъминланган оилалар фарзандлари куни узайтирилган гуруҳга ой давомида тўлиқ қатнашмаган ҳолларда, тўлов тўлиқ бўлмаган ой учун, яъни бола амалда куни узайтирилган гуруҳга қатнашган кунлар учун тўланади.

Бунда боланинг куни узайтирилган гуруҳга келмаган кунлари сони бир кунлик тўлов миқдорига кўпайтирилиб, кейинги ой учун тўлов суммаси чиққан суммага камайтиради.

12. Бир кунлик тўлов миқдори ойлик тўлов миқдорини куни узайтирилган гуруҳ иш кунларининг режадаги сонига бўлиш йўли билан аниқланади.

13. Тўлов ота-оналар билан умумтаълим муассасаси ўртасида тузилган шартнома асосида амалга оширилади.

Шартномалар бир ўқув йили учун тузилади.

14. Тўлов умумтаълим муассасасига хизмат кўрсатувчи тегишли ғазначилик бўлинимасининг ҳудудий ғазначилик ҳисобварағига ўтказилади.

15. Туман (шаҳар) халқ таълими бўлими умумтаълим муассасасидаги куни узайтирилган гуруҳга келмаган ўқувчилар, келмаган кунлар, ота-оналар (ёки уларнинг ўрнини босувчи шахслар) билан умумтаълим муассасаси ўртасида тузилган шартноманинг бекор қилинганлиги ёки тўлов тўхтатилганлиги тўғрисидаги маълумотларни ҳар ўқув йили ойнинг 5-санасига қадар умумтаълим мактаблари кесимида туман (шаҳар) ҳокимлиги ва “Маҳалла” хайрия жамоат фонди бўлимига тақдим этиб боради.

16. Ота-оналар томонидан шартнома шартларининг зарур даражада бажарилмаслиги, боланинг умумтаълим муассасасидаги куни узайтирилган гуруҳларда қатнашмаслиги ёки ўқишнинг бошқа муассасага ўтказилиши тўловни тўхтатиш учун асос бўлади.

4-боб. Яқунловчи қоида

17. Мазкур Низом талаблари бузилишида айбдор бўлган шахслар қонунчиликка мувофиқ жавобгар бўлади.

Кам таъминланган оилалар фарзандларининг
умумтаълим муассасаларидаги куни узайтирилган
гуруҳларда болалар таъминоти учун ота-оналар тўловини
қоплаб бериш тартиби тўғрисидаги низомга
1-илова

**Кам таъминланган оилалар фарзандларининг рўйхатларини шакллантириш
ва умумтаълим муассасаларидаги куни узайтирилган гуруҳларда болалар
таъминоти учун ота-оналар тўловларни қоплаб бериш
СХЕМАСИ**

Босқичлар	Субъектлар	Тадбирлар	Муддатлар
1-босқич	Туман (шаҳар) халқ таълими бўлими	<ol style="list-style-type: none">1. Умумтаълим муассасаларида таълим олаётган кам таъминланган оила фарзандларини аниқлайди.2. Умумтаълим муассасаларининг куни узайтирилган гуруҳларида ўқиш истагида бўлган ҳамда тўлов тўлашдан озод этилмаган кам таъминланган оилаларнинг фарзандлари рўйхатини шакллантиради.3. Шакллантирилган рўйхатларни Маҳалла ва оилани қўллаб-қувватлаш бўлими, Ёшлар ишлари агентлиги бўлими ҳамда “Маҳалла” хайрия жамоат фондининг бўлими билан келишади ва халқ депутатлари туман (шаҳар) кенгашига тасдиқлаш учун киритади.	<p>Ҳар йили 1 августга қадар</p> <p>Ҳар йили 5 августга қадар</p> <p>Ҳар йили 10 августга қадар</p>
2-босқич	Туман (шаҳар) халқ таълими бўлими	<ol style="list-style-type: none">1. Халқ депутатлари туман (шаҳар) кенгаши қарорини умумтаълим муассасаларига еткази.2. Умумтаълим муассасалари ва ота-оналар (ёки уларнинг ўрнини босувчи шахслар) билан шартнома тузади.3. Тузилган шартномаларнинг нусхаларини жамлайди ва туман (шаҳар) ҳокимлиги, Маҳалла ва оилани қўллаб-қувватлаш бўлими, Ёшлар ишлари агентлиги бўлими ҳамда “Маҳалла” хайрия жамоат фонди бўлимига юборади.4. Куни узайтирилган гуруҳга келмаган болалар, келмаган кунлар, ота-оналар билан умумтаълим муассасаси ўртасида тузилган шартноманинг бекор қилинганлиги ёки тўлов тўхтатилганлиги тўғрисидаги маълумотларни туман (шаҳар) ҳокимлиги ва “Маҳалла” хайрия жамоат фонди бўлимига тақдим этиб боради.	<ol style="list-style-type: none">1. Кенгаш қарори қабул қилингандан кейин бир кун ичида2. Қарор келиб тушган кундан уч кун ичида3. Кенгаш қарори қабул қилингандан кейин ўн кун ичида4. Ҳар ойнинг бешинчи санасига қадар
3-босқич	Туман (шаҳар) ҳокимлиги, “Маҳалла” хайрия жамоат фонди бўлими	Халқ депутатлари туман (шаҳар) кенгаши қарори ва шартномаларга асосан тўловларни амалга оширади.	Ҳар ойнинг 10-санасига қадар

Кам таъминланган оилалар фарзандларининг
умумтаълим муассасаларидаги куни узайтирилган
гуруҳларда болалар таъминоти учун ота-оналар тўловини
қоплаб бериш тартиби тўғрисидаги низомга
2-илова

Умумтаълим муассасаларидаги куни узайтирилган
гуруҳларга қатнайдиган болалар
РЎЙХАТИ

Т/р	Ф.И.О.	Умумтаълим муассасаси (рақами ва номи)	Боланинг яшаш манзили	“Дафтар”ларнинг қайси бирида рўйхатга туриши ёки турмаслиги
1.				
2.				
3.				
...				

1. _____ туман
(шаҳар) _____ ҳокимининг ёшлар
сиёсати, _____ ижтимоий
_____ ривожлантириш ва маънавий-
(Ф.И.О.) _____ (имзо) маърифий ишлар бўйича
_____ ўринбосари

2. _____ туман
(шаҳар) _____ маҳалла ва оилани қўллаб
_____ қувватлаш бўлими бошлиғи
(Ф.И.О.) _____ (имзо)

3. _____ туман
(шаҳар) _____ “Маҳалла” хайрия жамоат
_____ фонди бошлиғи
(Ф.И.О.) _____ (имзо)

4. _____ Ёшлар
_____ ишлари агентлигининг туман
(шаҳар) _____ бўлими бошлиғи
(Ф.И.О.) _____ (имзо)

Вазирлар Маҳкамасининг
2021 йил 16 августдаги 523сон қарорига
2-илова

**Ўзбекистон Республикаси Хукуматининг айрим ҳужжатларига
киритилаётган ўзгартириш ва қўшимчалар**

1. Вазирлар Маҳкамасининг “Ёшларни ижтимоий қўллаб-қувватлаш бўйича қўшимча чора-тадбирлар тўғрисида” 2021 йил 11 мартдаги 132-сон қарорида:

а) 3-банд қуйидаги мазмундаги ўн биринчи хатбоши билан тўлдирилсин:

“Ёшлар дафтари”га киритилган кам таъминланган оилаларнинг умумтаълим муассасаларидаги куни узайтирилган гуруҳларга қатнаётган ҳар бир фарзанди учун тўловни ўқув йили давомида ҳар бир ой учун БҲМнинг 25 фоизигача бўлган миқдорда қоплашга;”;

б) ўн биринчи хатбоши ўн иккинчи хатбоши деб ҳисоблансин;

в) 1-илованинг 5-банди қуйидаги мазмундаги ўн биринчи хатбоши билан тўлдирилсин:

“Ёшлар дафтари”га киритилган кам таъминланган оилаларнинг умумтаълим муассасаларидаги куни узайтирилган гуруҳларга қатнаётган ҳар бир фарзанди учун тўловни ўқув йили давомида ҳар бир ой учун БҲМнинг 25 фоизигача бўлган миқдорда қоплашга;”.

г) ўн биринчи хатбоши ўн иккинчи хатбоши деб ҳисоблансин.

2. Вазирлар Маҳкамасининг 2020 йил 22 апрелдаги 213-ф-сон фармойиши билан тасдиқланган “Саховат ва кўмак” жамғармаси тўғрисидаги низомнинг 6-банди “таъминлаш” сўзидан кейин “, шунингдек, “Темир дафтар”га киритилган ёки “Ёшлар дафтари”, “Аёллар дафтари” ва “Темир дафтар”га киритилмаган кам таъминланган оилаларнинг фарзандлари учун умумтаълим муассасаларидаги куни узайтирилган гуруҳлардаги тўловни қоплаш” сўзлари билан тўлдирилсин.

